

# Akuutissat ozonimik aseruisartut ilaat pillugit Namminersorlutik Oqartussat nalunaarut

Avatangiisit innarlitsaaliorneqarnissaanik Inatsisartut inatsisaanni nr. 9-mi, 22. november 2011-meersumi § 10, imm. 1, nr. 1, 7 aamma 20, aamma § 66 imm. 3, aamma imaani avatangiisit illersorneqarnissaat pillugu Inatsisartut inatsisaanni nr. 15-imi, 8. juni 2017-imeersumi, Inatsisartut inatsisaatigut nr. 8-kkut, 27. november 2018-imeersukkut allannguuteqartinneqartumi § 32, imm. 4, aamma § 63 naapertorlugit aalajangersarneqarput:

## Atuuffii

**§ 1.** Nalunaarut manna nunami sumiiffinnut akisussaaffigisanut aamma immami sumiiffinnut akisussaaffigisanut atuuppoq.

*Imm. 2.* Nalunaarummi akuutissat nakkutigisat, taakkunungalut tunisassiat akuutissanik nakkutigisanik akoqartut, imaluunniit atorineqarnerminni akuutissanik taakkuninnga pinngitsuuisinnaanngitsut maleruagassiuunneqarput.

*Imm. 3.* Akuutissat nakkutigisat nalunaarummi matumani akuutissatut kemiskiusutut taakkulu isomeriisut, kisimiitinneqarsinnaasutut imaluunniit akuutissanut allanut akulerunneqarsinnaasutut paasineqassapput, akui oqimaassutsimi 1 procenti sinnerlugit annertussuseqarpata:

- 1) CFC-it tamarmik (chlorfluorcarbonit tamakkiisumik tarajunngortitsisartut).
- 2) Tetrachlormethanit
- 3) Trichlorethanit.
- 4) Halonit tamarmik (bromfluorcarbonit, bromchlorcarbonit aamma bromchlorfluorcarbonit tamakkiisumik tarajunngortitsisartut).
- 5) HBFC-it (hydrobromfluorcarbonit) tamarmik.
- 6) HCFC-it (hydrochlorfluorcarbonit) tamarmik, taamaallaat HCFC-t (HCFO-t) naammatsissimangitsut pinngagit.
- 7) Methylbromidit.
- 8) Bromchlormethanit.

**§ 2.** Nalunaarut makkununga atuutinnilaq:

- 1) akuutissat nakkutigisat, akuutissanik kemiskiusunik sananermut atorussanut, nalunaarummut matumunnga ilaatinneqanngitsunut atorineqartut, aamma
- 2) najuuttakkat annertussusilikkat aamma nakorsaatinut pumpit, akuutissanik nakkutigisanik akullit.

*Akuutissanik nakkutigisanik atuinissamut sananissamullu piumasaqaatit*

**§ 3.** Akuutissanik nakkutigisanik atuinermi akuutissanik nakkutigisanik seerisoornissaq aniatitsisoornissarlu qanorluunniit ittoq pinngitsoortinniarlugu annikillissarniarlugulu isumannaallisaanermi iliuusissanik naammaginatunik tamarmik aalajangersaasoqassaaq.

**§ 4.** Akuutissanik nakkutigisanik inuussutissarsiutigalugu sananeq inerteqqutaavoq.

*Imm. 2.* Akuutissanik nakkutigisanik katersoqqitaanngitsunik inuussutissarsiutigalugu atuneq inerteqqutaavoq, taamaattorli imm. 3-p immikkoortuata aappaa takuuk.

*Imm. 3.* Haloninik tamanik, nutaanik katersoqqitanillu inuussutissarsiutigalugu atuneq inerteqqutaavoq. Kisiannili timmisartuni haloninik atuinissaq inerteqqutaanngilaq.

*Imm. 4.* Inuussutissarsiorneq siunertaralugu akuutissanik nakkutigisanik tunisassianut immeeqqusaanngilaq, taakkunungalu sanaartukkat ilaapput.

*Imm. 5.* Haloninik tamanik, nutaanik katersoqqitanillu immiineq inerteqqutaavoq. Kisiannili halonit katersoqqitat ukununga immiunneqarsinnaapput:

- 1) timmisartunut atortut, aamma
- 2) timmisartuni qatserutit tigummiartakkat.

*Tunisassianik, akuutissanik nakkutigisanik akulinnik tikisitsinissamut, atuinissamut pigisaqarnissamullu piumasaqaatit*

**§ 5.** Tunisassianik, kemii atorlugu akuliussaangitsunik, aammalu akuutissanik nakkutigisanik akulinnik inuussutissarsiutigalugu tikisitsinissaq avammulluunniit tunisinissaq inerteqqutaavoq.

Inerteqquteqarnermut timmisartunik umiarsuarnillu avammut tunisisarnerit ilaatinneqanngillat.

*Imm. 2.* Tunisassianik, kemii atorlugu akuliussaangitsunik aammalu akuutissanik nakkutigisanik akulinnik inuussutissarsiutigalugu tunisinissaq inerteqqutaavoq, taamaattorli imm. 3 takuuk.

*Imm. 3.* Kalaallit Nunaanni tunisassianik ingerlatitseqqilluni tunisisoqarsinnaavoq,

- 1) siullermeertumik tunisanik, danskit kalaallillu piumasaqaataannik naammassinniffusunik, imaluunnii
- 2) siullermeertumik tunisanik, EU-mi piumasaqaatinik, akuutissat ozonimik nungutsitsisartut eqqarsaatigalugit illersuinissamik assingusumik qulakkeerriffusunik naammassinniffusunik.

**§ 6.** Tunisassiat, akuutissanik nakkutigisanik akullit aammalu inerteqqutaanngitsumik pissarsiarineqarsimasut atuinneqarsinnaapput, taamaattorli imm. 2 takuuk.

*Imm. 2.* Qatserutit halonimik akullit timmisartunut imaluunniit umiarsuarnut nunani allani nalunaarsorsimasunut ikkusimanngippata, qatserutininik angallattakkanik aalajangikkanillu peqarnissaq inerteqqutaavoq.

**§ 7.** Suliffeqarfiit nillartaatsivinnik, silaannarmik isugutserutininik, kissamut pumpinik imaluunniit ikuallattoornissamut sillimmatinik ikkusimasunik, akuutissanik nakkutigisanik akulinnik suliaqartut uku malinneqarnissaannik qulakkeerrissapput:

- 1) Sanaartukkat sullississutilluunniit akuutissanik nakkutigisanik nillasaatitalinnik 3 kg-nik oqimaannerusunilluunniit akullit ukiumut minnerpaamik ataasiarluni seerisoqarnersoq

misissorneqartassapput. Tamannali sanaartukkanut sullississutinulluunniit, silaannarmik ussissunngorlugit matusanut, taamatullu nalunaaqutsikkanut, aammalu akuutissanik nakkutigisanik 6 kilogrammit inorlugit akusanut atuutinngilaq.

2) Sanaartukkat sullississutinulluunniit akuutissanik nakkutigisanik nillasaatitalinnik 30 kg-nik oqimaannerusunilluunniit akullit minnerpaamik qaammatit arfinilikkaarlugit seerisoqarnersoq misissorneqartassapput

3) Sanaartukkat sullississutinulluunniit akuutissanik nakkutigisanik nillasaatitalinnik 300 kg-nik oqimaannerusunilluunniit akullit minnerpaamik qaammatit pingasukkaarlugit seerisoqarnersoq misissorneqartassapput

*Imm. 2.* Seerisunik nassaartoqarpat erngerluni, aammalu pisuni tamani ullut 14-it qaangiutsinnagit iluarsaassisoqassaaq. Taamatulli killiliinermut kinguaattoorutit, silamik, sivisuallaamik angalanermik imaluunniit pissutsinik allanik, akisussaasuusup nakkutilliinerata avataaniittunik pissuteqartut ilaatinneqassanngillat. Sanaartugaq sullississutinulluunniit pineqartoq seerisoqarnerani iluarsaanneqareernermit kingorna kingusinnerpaamik qaammatip ataatsip qaangiunnerani seerisoqarnersoq misissorneqassaaq, iluarsaassineq pitsaasumik suliarineqarsimanersoq qulakkeerniarlugu.

*Imm. 3.* Suliffeqarfii imm. 1-mi taaneqartut akuutissat nakkutigisat akuliunneqartut annertussusaannik suussusaannillu, aammalu aserfallatsaaliuinnermi suliaqarnermilu katersoqqinneqartut annertussusaannik, taamatullu sanaartukkanik sullississutinulluunniit iginneqavittunik nalunaarsuissapput. Nalunaarsuiffik qinnuteqartoqarneratigut nakkutilliinermi oqartussaasunut atugassanngortinneqassaaq.

**§ 8.** Nillartaatitsivinnik, silaannarmik isugutserterutinik, kissamut pumpinik, atortunik akuutissanik nakkutigisanik arrortitsissutitut atuiffusunik, ikualattoornissamut isumannaallisaatinik qatserutinillu suliaqarnermi, aserfallatssaaliuinnermi isaterinnermilu akuutissanik nakkutigisanik atueqqinnissaq pilersitseqqinnissarlunniit siunertarlugu katersueqqinnissaq qulakkeerneqassaaq, imaluunniit piioneerutsitsinissaq siunertarlugu katersueqqinnissaq qulakkeerneqassalluni.

*Imm. 2.* Akuutissat nakkutigisat, imm. 1-mi taaneqartut saniatigut tunisassianut allanut akulerunneqarsimasut piioneerutsitsinissaq, atueqqinnissaq sanaqqinnissarlunniit eqqarsaatigalugu teknikki aningaasaqarnerlu eqqarsaatigalugit ajornartinnagu katersoqqinneqasapput, imaluunniit katersueqqaarani piioneerutsinneqassallutik.

*Imm. 3.* Suliassanik imm. 1-mi imaluunniit 2-mi taaneqartunik suliaqartup iliuusissat, akuutissanik nakkutigisanik seerisoornissamik unitsitsisussat killiliisussallu ilisimassavai, taakkunungalu tunisassiat taaneqartut atorlugit eqqortumik annertusaanissaq, immeeqqinnissaq maqitsinissallu ilaatinneqarput.

*Imm. 4.* Suliffeqarfii suliassanik imm. 1-mi imaluunniit 2-mi taaneqartunik suliaqartut suliassat inunnit imm. 3-mi piumasaqaatinik naammassinnittunit suliarineqarnissaat qulakkiissavaat.

*Imm. 5.* Akuutissat nakkutigisat kiisalu tunisassiat akuutissanik taamaattunik akullit piioneerutsitsisarnermut teknologiit avatangiisinut mingutsitsinnginnerpaat, naammaginangitsunik aningaasartuuteqarfiususaanngitsut atorlugit piioneerutsinneqassapput.

**§ 9.** Nalunaarummi matumani maleruagassat malillugit nunami sulianik nakkutilliinerit misissuinerillu Kommunalbestyrelsimit isumagineqassapput.

*Imm. 2.* Kisiannili Avatangiisinut Naalakkersuisoq suliffeqarfinnik, avatangiisit innarlitsaaliorneqarnissaanik Inatsisartut inatsisaanni kapitali 5 imaluunniit kapitali 8 naapertorlugit akuersissuteqarnissamut pisariaqartitsiviusunik nakkutilliinermik isumaginnittuussaaq.

*Imm. 3.* Imartami akisussaaffeqarfusumi umiarsuit imaani avatangiisit illersorneqarnissaat pillugu Inatsisartut inatsisaanni kapitali 19 naapertorlugu nakkutigineqassapput misissuiffigineqartassallutillu.

**§ 10.** Avatangiisinut Naalakkersuisoq pisuni immikkut ittuni nalunaarummi matumani piumasaqaatit saneqqunneqarsinnaaneritut akuersisinnaavoq, tassungalu ilanngullugu saneqqutsinissamut akuersisinnaalluni:

- 1) halonit ulorianartorsionerni atorineqarnissaannut,
- 2) akuutissat nakkutigisat siunertanut, avatangiisit peqqinnissarlunniit eqqarsaatigalugit artorsartitsinnginnerusunik qinigassaqartoqartinnagu, aammalu atuineq pingaarutilittut isumaqartillugu naliliisoqarneratigut atorineqarnissaannut,
- 3) HCFC-t laboratoriani sulianut atorineqarnissaannut, taakkununga ilisimatusarnerit ineriartortitsinerillu ilaangullugit,
- 4) akuutissat nakkutigisat siunertanut, sumiiffimmi atuiffusumi akuutissanik ozonimik aseruisartunik aniatitsinermik annertuumik annikillititsinermik kinguneqartunut atorineqarnissaannut, imaluunniit,
- 5) tikisitsinerup § 5, imm. 1-imi inerteqquteqarnermut ilaatinneqarnerani.

#### *Maalaarutit*

**§ 11.** Nalunaarut manna naapertorlugu aalajangiinerit avatangiisit innarlitsaaliorneqarnissaanik Inatsisartut inatsisaanni kapitali 14-imi maleruagassat malillugit maalaarutigineqarsinnaapput.

#### *Pineqaatissiisarnerit arsaarinnittarnerillu*

**§ 12.** § 3-mik, § 4-mik, § 5, imm. 1-mik imaluunniit 2-mik, § 6, imm. 2-mik, § 7-imik imaluunniit § 8-mik unioqqutitsisoq, § 9 naapertorlugu misissuinissamut akerliusoq imaluunniit § 10 naapertorlugu immikkut ittumik akuersissuteqartoqarnissaanut piumasaqaatinik unioqqutitsisoq pineqaatissinneqarluni akiliisussanngortinneqarsinnaavoq.

*Imm. 2.* Pinerluttulerinermut Inatsimmi maleruagassat kapitali 5-imi naapertorlugit ingerlatseqatigiiffinnut il.il. (suliffeqarfinnut) pinerluttulerinermi inatsisitigut akisussaasunngortinneqarsinnaavoq.

*Imm. 3.* Nalunaarummik matuminnga unioqqutitsisoqarnerani pinerluttulerinermut inatsimmi maleruagassat naapertorlugit arsaarinnittoqarsinnaavoq

*Imm. 4.* Akiligassanngortitat arsaarinnissutillu Nunap Karsianut nakkartinneqartassapput.

#### *Atuuttussanngortitsineq atorunnaarsitsinerlu*

§ 13. Nalunaarut 1. novembari 2022-mi atuutilerpoq.

*Imm. 2.* Ilutigalugu Sananeqaatit ozonimik aseruisartut ilaasa atorneqarnerannut inerteqqut pillugu Namminersornerullutik Oqartussat nalunaarutaat nr. 30, 10. august 2001-imeersaq atorunnaarpoq.

*Namminersorlutik Oqartussat, ulloq 27. oktober 2022*

Kalistat Lund

Nunalerinermut, Imminnut Pilersornermut, Nukissiutinut Avatangiisinullu Naalakkersuisoq

/ Natuk Lund Olsen

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut